



raspada da Zernez

cun las fracziuns Brail, Lavin, Susch e Zernez

dad avuost fin october 2025

Las Baselgias perdan commembers – in tuot l'Europa ed eir pro nus

La statistica disch cha in Svizra fan part be amo raduond 50% da la populaziun ad üna da las duos grondas Baselgias naziunalas. Raduond 20% dals Svizzers sun refuormats e raduond 30% sun commembers da la Baselgia catolica. Ad otras cumünanzas cristianas fan part amo bod 10%. La part da la populaziun in Svizra chi nu fa part ad ingüna

cumünanza religiosa fa oura intant passa 30%. Eir nossa raspada ha on per on sortidas, schabain be singulas.

Als motivs per sortir sun tenor retscherchas fich variats. Uschè haja dat dal 2023 ün record da 67'500 persunas chi han tut l'occasiun per sortir da la baselgia catolica causa la studia da maladöver corporal e sexual chi ha dat tras expoints da la Baselgia. Pervia da quella studia ha eir la Baselgia refuormada gnü quel on ün record da sortidas da 34'000 persunas. Nossa corporaziun ha quel on surgni perfin chartas da persunas chi han scrit ch'ellas sortan da la Baselgia catolica, causa cha in üna lai d'eiran güsta sortits tuots duos consorts e nu vaivan dat la fadia da corregger la charta copchada dal partenari chi d'eira catolic. Fich bleras persunas indichan in



retscherchas publicas chi crajan eir sainza Baselgia o lura chi nun hajan amo mai gnü cretta e sajan ünsacura sortits. Be pacs dan pro dad avoir spargnä cuosts d'impostas eir scha in congual l'import nun es ot. Fich blera glieud chi sorta disch da far quai causa ovais-chs, ravarendas, presidents o oters funcziunaris da Baselgia.

Als motivs nomnats nun han però propcha bler da far cul concept Baselgia. La Baselgia es üna cumünanza da cristians, dimena sun tuots Baselgia. In quel sen fessa daplü sen da s'ingaschar per üna megladra Baselgia, scha quella fa sbagls. Però da sortir dad üna cumünanza da cristians pervia da singulas persunas es invan e nu fa ingün sen. Quai vain valütà sco s-chüsa per far alch sainza cler motiv o cun ün motiv zoppà.

Eu svesse vaiva eir avant passa 35 ons üna vouta fat impissamaints sur d'üna sortida, e d'eira quella vouta eir da l'avis cha crajer as possa eir sainza Baselgia. Eu vaiva però lura vis aint cha per nudrir la cretta douvra la cumünanza ed il barat illa cretta cun oters. Inandret sen da sortir fessa insè propcha be schi nu s'ha cretta. Retscherchas muossan cha blers vessan bainschi cretta ed han be neglet, invezza da nudrir quella.



Cults divins fin dad avuost fin oktober 2025

Data	Brail	Zernez	Susch	Lavin	divers
avuost 2025					
03 - 08	11:00 d Beni Manig				
10 - 08				11:00 r/d Othmar Lässer	
17 - 08	Ingüna predgia				
24 - 08			11:00 r Fadri Häfner		
31 - 08		11:00 r/d Jon Janett			
settember 2025					
07 - 09			09:45 r M. Schleich	11:00 r M. Schleich	
14 - 09		11:00 r Seraina Guler			
21 - 09			11:00 r/d Fadri Häfner		Festa federala ecumena Bas. Cat.
28 - 09		11:00 r Jon Janett		09:45 r Jon Janett	
oktober 2025					
05 - 10		09:45 r M. Schleich	11:00 r M. Schleich		
12 - 10	Ingüna predgia				
19 - 10		09:45 r Fadri Häfner		11:00 r Fadri Häfner	
26 - 10	11:00 r M. Schleich		09:45 r M. Schleich		
r: liturgia e predgia in rumantsch; r/d: liturgia in rumantsch, Predigt deutsch d: Liturgie und Predigt deutsch					

Viadi culs seniors a Landeck, mardi als 19 avuost 2025



La foto muossa la cumpagnia da viadi l'on passà a Poschiavo.

Nos viadi organisà da las baselgias per tuot las senioras ed ils seniors da nos cumün ha lö quista stà in mardi, als 19 avuost. Quai chi's po intant fingià tradir, es cha'l viadi maina giò pel En fin a Landeck per visitar là il bel chastè sur la pitschna cità. Ot sur la cità bavaina il caffè e giodain üna visita guidada dal museum dal chastè, avant co ir giò in cità per gantar e passantar ün pa temp liber illa zona da peduns. Ün invid vain tramiss a minchüna e minchün.

Inscunter cun genituors e preparands, als 11 settember, a las 19.00 in chasa pravenda

Daspö la confirmaziun ha nossa raspada quatter novas confirmandas e cun quai daja eir darcheu üna nouva classa da preparandas e preparands chi cumainzan quist utuon cun lur uras e realiseschan insembel il cult divin da la prüma dumengia d'Advent. Sco act inicial da las uras da preparands daja ün inscunter insembel culs genituors. Quist vala sco preavis ed ils giuvenils cun lur genituors survegnan d'ürant la stà amo ün invid per quel inscunter in chasa pravenda.



Festa da rogaziun federala cun cult divin ecumenic, quist on a Susch



Sco minch'on vain festagià il cult divin da la festa federala eir quist on sco cult divin ecumenic. Quel ha lö quist on **als 21 da settember, a las 11.00** in baselgia catolica a Susch e vain manà dal preir Mathew Charthakuzhiyil ed il predichant laic, Fadri Häfner. Il cult divin vain imbelli da la grupp da corns da Chatscha Sarsura chi dà lura eir amo ün concert d'ürant l'aperitiv chi vain sport davo il cult divin i'l curtin da la baselgia o in cas da trid'ora i'l foyer da la baselgia.

Program da stà adüna be cun ün cult divin per tuot las fracziuns

Minch'on d'ürant il mais d'avuost müda nossa raspada sün program da stà. Invezza da far plüs cults divins in differentas fracziuns da nossa raspada ha lö d'ürant quel mais mincha dumengia be ün cult divin e quai micha jada in ün'otra fracziun da nos cumün. Cün quai cha quist on ha l'avuost per üna jada tschinch dumengias daja eir amo üna dumengia sainza cult divin. Persunas chi dovran üna pussibiltà da transport dessan s'annunzchar pro'ls commembers dal consistori o pro'l secretariat e lura as riva sgüra in mincha cas dad organisar qualchosa. In quel sen bella stà in üna cumünanza ed üna raspada.



Il viadi da confirmands da quist on maina a Roma



Cun cuorta excepziun organiseschan nossa raspada e la raspada catolica insembel fingià sur ün decenni il viadi da confirmands ed il viadi da craismants sco viadi cumünaivel. Listess es quist on ün pa ün on special. Pel solid d'eiran daplü confirmandas e confirmands ed il viadi gniva organisà da la raspada refuormada eir pels catolics. Quist on es ün uschè nomnà „on sonch“ o eir „*annus iubilaeus*“ da la baselgia catolica chi dà daspö var 700 ons e d'ürant ils ultims 600 ons per regla mincha 25avel on. E

quist on daja daplüs giuvenils catolics da l'ultim on da scoula in nos cumün. Uschè organisescha la raspada catolica il viadi e quel maina pel on dals „Pelegrins da la spranza“ a Roma. Ils giuvenils vezzan la cità ed il Vatican ed han perfin la pussibilità da's partecipar ad üna audienza pro'l Papa. Il viadi ha eir quist on lö sco adüna d'ürant la seguond'eivna da las vacanzas d'utuon in october. Per nossas quatter confirmandas e lur cumpognas e cumpogns da classa chi fan lur viadi da craisma es quai sgürischem ün'aventüra chi restarà in memoria. In quel sen giavüschaina ad tuottas e tuots: „Bun viadi“.

Festa da la racolta – als 26 october sco adüna a Brail e quist on a Susch

La festa da la racolta es quella festa cha in nossa raspada es ün dals duos cults divins chi ha lö adüna a Brail. Il seguond lö va in rouda tras las otras trais fracziuns e quist on es la sort pro Susch. Daspö blers ons vaina nus eir spostà ils cults divins da la festa da la racolta cun soncha tschaina da la prüma dumengia sün l'ultima dumengia d'october. Il motiv d'eira stat la festa da la racolta chi vain fatta in Val Müstair. Sco adüna ils ultims ons saran nossas confirmandas partecipadas eir quist on als cults divin cun Soncha tschaina chi han lö in **dumengia als 26 october, a las 9.45 a Susch ed a las 11.00 a Brail** cun ravarenda Magnus Schleich.



In tschercha da ravarenda – ün per infuormaziuns

Davo cha nossa raspada vaiva scrit oura in favrer e marz il prüm la piazza da ravarenda sco eir la piazza da substitut illa pravenda, vaivan nus gnü üna annunzcha valabla dad ün ravarenda giuven da la Germania chi vaiva però our da motivs familiars darcheu trat inavo sia annunzcha. Davo vain nus bainschi gnü personas in pensiun chi s'han interessadas per rimplazzamaints, ma mai propcha da maniera seriusa e valabla. Nus vain uossa amo ün giuven ravarenda svizzer chi metta in vista üna eventuala substituziun plü lunga al cumanzamaint dal prossem on. Perspectives a plü lunga vista da chattar inchün daja eir, ma pel mumaint ha il consistori decis da scriver oura amo üna jada la piazza da ravarenda ed eir per üna eventuala substituziun.

Contacts cun la raspada:

Presidi:

Hermann Thom 079 413 02 03
obain hesti@bluewin.ch

Secretariat:

Flurina Walter 079 586 12 39
obain flurinawalter@hotmail.com

Nossa homepage: <https://zernez-ref.ch>